

# Libertat!

Nos ta gosa bastante privilegio bibando riba un isla demokrátiko. Si nos kuminsá enumerá nan, sin duda un di e privilegionan ku lo enkabesá nos lista lo ta libertat. Nos ta konvensé ku tur hende mester ta kompletamente liber pa pensa, bisa, òf hasi loke nan ta deseá, sin restriksjon, sin ser kontrolá pa otronan. Segun nos konsepto, esaki ta libertat!

Nos por mensioná vários forma di libertat ku nos isla ta gosa. Un di esnan fundamental ta e libertat pa bisa públikamente òf den privá loke bo ta pensa. Otro libertat ta dependé di esun aki, manera libertat di prensa. E derechu pa publiká òf transmití faktonan, ideanan, i opinionnan sin estorbo di gobièrnu òf otro gruponan ta algu ku hopi pais no konosé. Igualmente, libertat di religion ta duna hende e derechu pa kere i praktiká e kreensia di nan preferensia, òf pa rechasá tur religion. Tambe tin libertat polítiko, ku ta duna suidadanonan e derechu pa vota, pa skohe e kandidato preferí, e oportunidat pa postulá bo mes komo un kandidato, e derechu pa kritiká pólisanan di gobièrnu, i e libertat pa afiliá na e partido polítiko di bo preferensia.

Otro libertat por ser mensioná, manera e derechu pa reuní i forma gruponan. Tin libertat akadémiko tambe, esta e derechu pa siña, deskutí, investigá, skirbi i publiká sin estorbo. Ademas, libertat den nos sistema hurídiko ta sòru ku e akusado no por ser kastigá promé ku ta kumpli ku sierto rekisito legal. Esaki ta proteh'é di enkarselashon in hustu. Tambe por mensioná libertat ekonómiko, loke ta inklui e derechu pa ta doño di propiedat, pa us'é, benefisiá for di dje, pa skohe òf kambia trabou, pa spar sèn òf us'é segun bo ta haña ta bon.

Gradisí Dios pa e libertatnan ku nos ta gosa riba nos pid'i baranka!

Ma nos kreensia ku hende mester ta kompletamente liber pa bisa òf hasi loke nan ke, sin restriksjon, ta un konspto malamente kiboká. Ta un echu ku ningun di e libertatnan ku nos a lista ta sin restriksjon. Tin LIMITE na kada libertat.

Un motibu pa limitá libertat ta pa protehá bienestar di otronan...i asta di bo mes! Mi ta liber pa zuai mi man den laira. Pero mi libertat ta limitá ora bo kara ta mi dilanti. Mi ta liber pa manehá mi outo na banda drechi di kaminda ma no ta banda robes.

E libertat pa bisa loke bo ta pensa no ta sin limitashon. Bo no ta liber pa grita "Kandela!" den un edificio yen di hende. Ningun hende ta liber pa dañá reputashon di otro dor di kalumnia. Bo no ta liber ta instigá un lamtamentu. Tin lei kontra pornografia pa protehá moralidat. Asta libertat di religion no ta sin restriksjon. Sierto práktika religioso ta prohibí, manera sakrifisio humano òf poligamia (kasa ku mas ku un persona, loke islam ta pèrmití).

Nò, ningun persona ta KOMPLETAMENTE LIBER pa hasi òf bisa loke e ke! Nos por yama Dios danki ku nos isla no konosé e sorto di "libertat" ei. Ken lo ke biba den un situashon tan kaótiko, opresivo, i insoportabel? Hopi hende ta haña Dios Su mandamentunan fastioso, fèrfelu, i frustrante. Segun nan opinion, esakinan ta stroba nan di gosa bida manera nan ke. Ma en realidat, e restriksjonnan di libertat ku Skritura santu ta imponé ta entre otro pa e mésun motibu ku un demokrasia ta limitá e libertat di su suidadanonan...pa protehá otronan i bo mes.

Dios ta limitá libertat pa nos propio bienestar! Moises a reta, "..warda (Dios) Su statutonan i Su mandamentunan ku mi ta dunábo awe, pa asina por bai bon ku bo i ku bo yunan despues di bo..." (Deuteronomio 4:40). Sin duda lo bo enkontrá problema serio si bo ta insistí pa manehá bo outo na man robes di karetera. Ta mes sigur ku bo lo sufri e konsekuensianan si bo ignorá Dios Su mandamentunan, sea ta den e bida aki òf despues di morto.

Nos ta bin komprendé anto ku libertat bèrdadero NO ta e abilidad pa hasi òf bisa loke bo KE. Libertat bèrdadero ta e abilidad pa hasi òf bisa loke bo mester hasi òf bisa...e abilidad pa hasi òf bisa loke ta korekto i bon. En realidat, libertat bèrdadero ta e abilidad pa hasi òf bisa loke DIOS ke! Segun Beibel, "..si e Yu (Hesus) hasi boso liber, di bèrdat lo boso ta liber" (Juan 8:36).